



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

ZL.Anr.21/2025

PANELI ZGJEDHOR PËR ANKESA DHE PARASHTRESA (PZAP), në panelin e përbërë nga gjyqtarët : Arsim Hamzaj - kryesues, Kymete Kicaj dhe Skender Çoçaj - anëtarë, duke vendosur lidhur me ankesën e parashtruar nga [REDACTED] nga Prishtina, kryesuese e Iniciativës Qytetare “Epoka e Hyjneshës në Prishtinë” për Zgjedhjet Lokale në Prishtinë, paraqitur kundër Komisionit Qendror të Zgjedhjeve (KQZ), për tërheqje nga gara në Zgjedhjet Lokale 2025, në seancën e panelit të mbajtur me 10.09.2025, mori këtë:

V E N D I M

REFUZOHET E PABAZUAR ankesa ZL-Anr.21/2025 e datës 08.09.2025, e parashtruar nga [REDACTED] nga Prishtina, kryesuese e Iniciativës Qytetare “Epoka e Hyjneshës në Prishtinë”, parashtruar kundër Komisionit Qendror të Zgjedhjeve (KQZ), për tërheqje nga gara për shkaqe shëndetësore në Zgjedhjet Lokale 2025, që do të mbahen me datën 12 Tetor 2025.

A r s y e t i m

Me datë 08.09.2025 PZAP-i ka pranuar një ankesë nga [REDACTED] nga Prishtina, kryesuese e iniciativës “Epoka e Hyjneshës në Prishtinë”, e cila ka kërkuar të tërhiqet nga gara për shkaqe shëndetësore, edhe pse thekson se kërkesën për tërheqje të iniciativës nga procesi zgjedhor në KQZ e ka bërë më datë 09.09.2025. Tutje ka shtuar se kërkesa për tërheqje vie pasi që është jo në gjendje të mirë shëndetësore.

Parashtruesi krahas ankesës ka bashkangjitur si kërkesën e dorëzuar në KQZ për tërheqje nga gara në Zgjedhjet Lokale në Republikën e Kosovës, me datë 08.09.2025, një dokument me të cilën ka kërkuar tërheqjen nga kandidatura, një kopje të emailit dërguar KQZ-së me të cilën ka kërkuar tërheqjen nga gara.

PZAP-i me datën 08.09.2025 ka dërguar Komisionit Qendror të Zgjedhjeve (KQZ) kërkesën për përgjigje në ankesë.

Komisioni Qendror i Zgjedhjeve ka dërguar përgjigjen në ankesë më datën 09.09.2025, në të cilën theksohet se pas përfundimit të gjithë procesit të certifikimit të subjekteve politike

dhe kandidatëve të tyre, hapi i radhës është mbajtja e tërheqjes së shortit me ç'rast të gjitha subjektet politike të certifikuara tërheqin numrat e tyre me të cilët do të radhiten në fletëvotim. Tutje kanë shtuar se të gjitha kërkesat për tërheqje të subjekteve politike apo kandidatëve, pranohen dhe trajtohen përderisa arrijnë në Zyrën për Regjistrim, Certifikim dhe Kontrollin Financiar, deri në dy (2) ditë para datës së caktuar për tërheqje të shortit, sic përcaktohet me nenin 29 të LZP.

Kandidatët e “Epoka e Hyjneshës në Prishtinë” janë certifikuar me vendimin e Komisionit Qendror të Zgjedhjeve me numër 01/2087-2025 të datës 14.08.2025. Në këtë listë është përfshirë edhe kandidatja [REDAKTUAR] si kryesuese në listën për Asamblenë Komunale. Siç u theksua më lartë, në përputhje me paragrafin 1 të nenit 29 të LZP, kërkesat për tërheqje nga procesi zgjedhor bëhen duke i dorëzuar KQZ-së një njoftim me shkrim me të cilin shpreh qartazi qëllimin për tërheqje jo më vonë se dy (2) ditë të punës para datës së caktuar për hedhje të shortit për zgjedhje. Kanë theksuar se në përputhje me Planin Operacional për Zgjedhjet Lokale 2025, data e caktuar për tërheqjen e shortit është caktuar 4 Shtator 2025. Tërheqjet e kandidatëve janë pranuar deri më 2 Shtator 2025 në ora 11:59. Kandidatja [REDAKTUAR] ka bërë kërkesë në Zyrë përmes emailit, me datën 08 Shtator 2025 në ora 14:17. Rrjedhimisht, kërkesa e kandidatës nuk është pranuar dhe kandidatja është njoftuar që kërkesa në Zyrën është bërë jashtë afatit ligjor për tërheqje të kandidatëve.

Para datës së sipërpërmendur kur ka bërë kërkesë për tërheqje [REDAKTUAR], Zyra nuk ka pranuar kërkesë nga subjekti politik “Epoka e Hyjneshës në Prishtinë” për tërheqjen nga gara e kandidatës. Në përgjigje kanë bashkëngjitur edhe dëshmitë si email-in, e pranuar nga [REDAKTUAR] [REDAKTUAR] ne kërkesë për tërheqje dhe email-in, e kthyer nga Zyra me njoftimin se ka kaluar afati për tërheqje.

Paneli, pas shqyrtimit të ankesës së parashtruar nga ankuesi, gjeti se:

-Ankesa është e pabazuar.

Paneli pas vlerësimit të ankesës, ka gjetur se ankesa e parashtruar nga kandidatja për kryesuese nga radhët e Iniciativës Qytetare “Epoka e Hyjneshës në Prishtinë” është e pa bazuar.

Paneli ka gjetur se ankesa e parashtruar nga ankuesja është e pa bazuar pasi që në nenin 29 par. 1 të Ligjit për Zgjedhjet e Përgjithshme në Republikën e Kosovës, në mënyrë decisive thuhet se “Subjekti politik i certifikuar mund të tërhiqet nga procesi zgjedhor duke i dorëzuar KQZ-së një njoftim me shkrim me të cilin shpreh qartazi qëllimin për tërheqje jo më vonë se dy (2) ditë të punës para datës së caktuar për hedhje të shortit për zgjedhje, të përcaktuar sipas nenit 25.1 të këtij ligji.” Në këtë rast KQZ-ja e ka tërhequr shortin për renditjen e subjekteve politike në fletëvotim me datë 04.09.2025, ndërsa parashtruesja e ankesës, me ankesë nuk ka dorëzuar në PZAP prova materiale se brenda afatit ligjor të ketë dërguar shkresë në KQZ për tërheqje nga lista si kryesuese për asamble Komunale në Komunën e Prishtinës, që rezulton se parashtruesja e ankesës, dhe Iniciativa Qytetare “Epoka e Hyjneshës në Prishtinë” nuk kanë vepruar bazuar në nenin 29, paragrafit 1 të LZP-së. Për më tepër KQZ me datën 06.09.2025 e ka aprovuar përmbajtjen e fletëvotimeve, që do të thotë se ky aprovim është bërë para datës së parashtrimt të kërkesë për tërheqje nga ana e këtu palës ankuese, sepse e njëjta në KQZ ka dorëzuar kërkesë për tërheqje me datën 08.09.2025.

Në nenin 117.3 të Ligjit për Zgjedhjet e Përgjithshme në Republikën e Kosovës, në mënyrë decisive thuhet se : *“Vendosja për ankesat nga PZAP-ja mbështetet në dëshmi të qarta dhe bindëse.”*

Në nenin 118.1 të Ligjit për Zgjedhjet e Përgjithshme në Republikën e Kosovës, në mënyrë decisive thuhet se : *“PZAP-ja pranon ankesat e bazuara në fakte dhe refuzon ankesat të cilat nuk i përmbushin kriteret e miratuara paraprakisht.”*

Se parashtruesja e ankesës, dhe subjekti Iniciativa Qytetare “Epoka e Hyjneshës në Prishtinë” nuk kanë vepruar bazuar në nenin 29.1 të Ligjit për Zgjedhjet e Përgjithshme, e konstaton edhe vet parashtruesja e ankesës edhe në ankesën e saj drejtuar në PZAP, ndër të tjera ka theksuar se *“Unë Nedime Belegu nga Prishtina, candidate për kryetare e Iniciativës Qytetare “Epoka e Hyjneshës në Prishtinë” tërhiqem nga gara për shkaqe shëndetësore”,* andaj edhe nuk qëndrojnë pretendimet ankimore të saj.

Prandaj, nga arsyet e theksuara më lart si dhe duke u bazuar në dispozitat e nenit 117 paragrafi 3, 118 paragrafi 1, neni 119 paragrafi 3 të Ligjit Nr.08/L-228 për Zgjedhjet e Përgjithshme në Republikën e Kosovës, Paneli vendosi si në dispozitiv të këtij vendimi.

PANELI ZGJEDHOR PËR ANKESA DHE PARASHTRESA

ZL.A.nr.21/2025 më datën 10.09.2025.

Kryesues i Panelit

Arsim Hamzaj



KËSHILLA JURIDIKE: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.